

Möðruvallaprestakall	Möðruvalla-, Bakka-, Bægisár- og Glæsibæjarsóknir	Möðruvellir
Glerárprestakall	Lögmannshlíðarsókn	
Akureyrarprestakall	Akureyrar- og Miðgarðasóknir	
Laugalandsprestakall	Grundar-, Saurbæjar-, Hóla-, Möðruvalla-, Munkaþverár- og Kaupangssóknir	Syðra-Laugaland

Þingeyjarprófastsdæmi.

Prestakall	Sóknir	Prestssetur
Laufásprestakall	Svalbarðs-, Laufás- og Grenivíkursóknir	Laufás
Ljósavatnsprestakall	Draflastaða-, Háls-, Illugastaða-, Ljósavatns-, Lundarbrekku- og Þóroddsstaðarsóknir	Háls
Skútustaðaprestakall	Skútustaða-, Reykjahlíðar- og Víðihólssóknir	Skútustaðir
Grenjaðarstaðarprestakall	Grenjaðarstaðar-, Þverár-, Einarstaða- og Nessóknir	Grenjaðarstaður
Húsavíkurprestakall	Húsavíkursókn	Húsavík
Skinnastaðarprestakall	Skinnastaðar-, Garðs- og Snartarstaðarsóknir	Skinnastaður
Raufarhafnarprestakall	Raufarhafnarsókn	Raufarhöfn
Þórshafnarprestakall	Sauðanes- og Svalbarðssóknir	Þórshöfn

STARFSREGLUR

um sóknarnefndir.

I. Staða og störf. Ábyrgð og verkefni.

1. gr.

Sóknarnefnd starfar á grundvelli laga um stöðu, stjórn og starfshætti þjóðkirkjunnar og á evangelísk - lútherskum grunni.

Aðalsafnaðarfundur og safnaðarfundur sóknar bera ábyrgð á öllum málum er varða fjármál og skipulagsmál sóknarinnar.

Sóknarnefnd heldur formlega fundi með reglulegum hætti þar sem málefni sóknarinnar eru til umræðu og ákvörðunar. Hún fylgir eftir markaðri stefnu og ákvörðunum aðalsafnaðarfundu og er bundin af þeim. Sóknarnefnd annast um rekstur og framkvæmdir á vegum sóknarinnar samkvæmt því sem nánar er mælt fyrir í lögum og starfsreglum.

2. gr.

Sóknarnefnd fer með fjárstjórn sóknarinnar og umráð eigna hennar og ber ábyrgð þar á gagnvart safnaðarfundum.

3. gr.

Helstu önnur störf sóknarnefndar eru sem hér segir:

1. Hafa ásamt prestum forgöngu um kirkjulegt starf á vegum sóknarinnar.
2. Sjá til þess að viðunandi húsnæði og búnaður sé til guðsþjónustuhalds og annars safnaðarstarfs í sókninni.
3. Gæta þess að kirkju, búnaði hennar og safnaðarheimili sé vel við haldið.
4. Gæta að réttindum kirkju, að því leyti sem þau heyra undir nefndina og hafa umsjón með öllum fjárumum sóknar, kirkju og safnaðarheimilis.

5. Að sjá til þess að skráðir kirkjugripir og minningamörk séu verndaðir sbr. 4. kafla Þjóðminjalaga nr. 88/1989.
6. Ráða starfsfólk sóknar í samráði við sóknarprest.

II. Starfshættir sóknarnefnda.

Fjármál.

4. gr.

Sóknarnefnd skal í samráði við sóknarprest gera fjárhagsáætlun fyrir hvert almanaksár og hafa þar m.a. hliðsjón af starfsáætlun sóknarprests og annarra starfsmanna sóknarinnar. Fjárhagsáætlunin skal lögð fram á aðalsafnaðarfundi til kynningar og afgreiðslu.

Sóknarnefnd og sóknarpresti ber síðan að sinna verkefnum sínum og halda uppi starfsemi á grundvelli samþykkrar fjárhagsáætlunar.

5. gr.

Við ráðstöfun fjármagns sóknarinnar til skamms eða langs tíma skal ávallt gæta þess að fjárskuldbindingar vegna ýmissa framkvæmda komi sem minnst niður á almennu kirkjustarfi.

6. gr.

Sóknarnefnd er óheimilt að efna til fjárskuldbindinga með persónulegum ábyrgðum einstaklinga öðruvísi en fyrir liggja raunhæf áætlun um tekjur sóknarinnar er standi að fullu undir endurgreiðslu þessara skuldbindinga.

7. gr.

Sóknarnefnd getur ekki veðsett eignir sóknarinnar nema með samþykki safnaðarfundar.

8. gr.

Sóknarnefnd sér til þess að bókhald sé fært í samræmi við lög og skal nota samræmdan bókhaldslykil eða annað form sem biskupsstofa leggur til.

9. gr.

Sóknarnefnd sér til þess að ársreikningur sóknar sé gerður fyrir hvert almanaksár. Ársreikningurinn skal áritaður af sóknarnefnd, endurskoðaður af kjörnum skoðunarmönnum eða endurskoðanda og lagður fram á aðalsafnaðarfundi til kynningar og afgreiðslu og síðan sendur prófasti.

10. gr.

Verði svo miklir fjárhagserfiðleikar í sókn að til vandræða horfi í fjármálum ber að boða til safnaðarfundar þar sem sóknarnefnd gerir söfnuði grein fyrir stöðu mála. Á þennan fund skal boða prófast. Ef hann að fengnum upplýsingum og að lokinni umfjöllun fundarmanna telur ástæðu til að styrkja fjármálastjórn safnaðarins hefur hann heimild til að skipa fulltrúa, einn eða fleiri, til að starfa með sóknarnefndinni á meðan verið er að koma málum í réttan farveg.

Fundir.

11. gr.

Sóknarnefnd boðar til aðalsafnaðarfundar með minnst viku fyrirvara og skal greina frá dagskrá fundarins í fundarboði. Fundinn skal auglýsa með þeim hætti sem venja er til um messubóð.

Þar skal taka fyrir eftirfarandi:

1. Gerð sé grein fyrir starfsemi og rekstri sóknarinnar á liðnu starfsári.
2. Afgreiðslu endurskoðaðra reikninga sóknar og kirkjugarðs fyrir sl. ár.
3. Greint frá starfsemi héraðsnefndar og héraðsfundi.
4. Ákvörðun um meiriháttar framkvæmdir og framtíðarskuldbindingar.
5. Kosning sóknarnefndarmanna og jafnmargra varamanna til 4ra ára.
6. Kosning tveggja skoðunarmanna eða endurskoðanda sóknar og kirkjugarðs og varamanna þeirra til árs í senn.
7. Kosning í aðrar nefndir og ráð.
8. Önnur mál.

12. gr.

Sóknarnefnd skiptir með sér verkum formanns, gjaldkera og ritara og varamanna þeirra þegar eftir að kjör í sóknarnefnd hefur farið fram. Sóknarnefnd er heimilt að kjósa úr sínum hópi framkvæmdanefnd er starfi á milli funda sóknarnefndar. Hún kýs jafnframt safnaðarfulltrúa og varamann hans og ákveður verkefni er hann hafi með höndum.

13. gr.

Formaður boðar fundi í sóknarnefnd og stýrir þeim og er fundur ályktunarfær ef meiri hluti nefndarmanna sækja fundinn.

Sóknarprestur og aðrir prestar í prestakallinu skulu að jafnaði sitja sóknarnefndarfundi og sóknarprestur fundi framkvæmdanefndar ef hún starfar. Enn fremur aðrir starfsmenn sóknarinnar ef málefni þeirra eru sérstaklega til umræðu á fundinum. Sóknarnefnd skal fylgja vanhæfisreglum stjórnisýslulaga um meðferð einstakra mála.

14. gr.

Allir fundir sóknarnefndar sem og safnaðarfunda skulu bókaðir og staðfestir af fundarmönnum. Þá skal sóknarnefnd gæta þess að varðveita bréf, bækur og skjöl er snerta kirkjuna og starfsemi hennar. Um vörslu þessara gagna skal fara í samræmi við lög um Þjóðskjalasafn Íslands nr. 66/1985.

15. gr.

Sóknarnefnd getur skipað nefndir úr sínum hópi eða utan hans til að fjalla um einstök málefni. Slíkar nefndir starfa á ábyrgð og í umboði sóknarnefndar sem setur þeim jafnframt erindisbréf.

16. gr.

Ef sóknarnefnd fer með stjórn kirkjugarðs sbr. 2. mgr. 8. gr. laga um kirkjugarða, greftrun og líkbrennslu nr. 36/1993, skal halda fjárhag kirkjugarðs algerlega aðgreindum frá fjárhag sóknar.

Ráðningar starfsmanna.

17. gr.

Sóknarnefnd, í samráði við sóknarprest, ræður starfsmenn sóknarinnar. Ráðningarsamningur starfsmanna skal vera skriflegur og með gagnkvæmum þriggja mánaða uppsagnarfresti, en mánaðar uppsagnarfresti á fyrstu þremur mánuðum í starfi. Sóknarnefnd í samráði við sóknarprest semur erindisbréf fyrir þessa starfsmenn.

18. gr.

Ef upp kemur ágreiningur um störf starfsmanna innan sóknar sem ekki tekst að leysa þar á vettvangi, skal vísa málinu til prófasts.

Nýbyggingar og viðhald.

19. gr.

Ef aðalsafnaðarfundur ákveður að reisa nýja kirkju, endurbyggja eða breyta verulega kirkju skal sóknarnefnd hafa samráð við bygginga- og listanefnd þjóðkirkjunnar. Sama hátt skal hafa á um aðrar fasteignir sóknarinnar svo sem safnaðarheimili.

Gildistaka.

20. gr.

Starfsreglur þessar, sem settar eru skv. heimild í 55. og 57. gr. laga um stöðu, stjórn og starfshætti þjóðkirkjunnar nr. 78/1997, öðlast gildi 1. janúar 1999.

Ákvæði til bráðabirgða.

Kosið skal til allra sóknarnefnda landsins á aðalsafnaðarfundum á árinu 1999, sbr. 52. og 53. gr. laga um stöðu, stjórn og starfshætti þjóðkirkjunnar nr. 78/1997. Að tveimur ár-um liðnum frá kosningunni skal nokkur hluti kjörinna aðalmanna og varamanna ganga úr nefndinni, þ.e. einn af þremur, tveir af fimm, þrír af sjö og fjórir af níu, og ræður hlutkesti, nema samkomulag sé innan nefndarinnar. Kjörtímabili annarra nefndarmanna lýkur eftir fjögur ár. Skal þessi tilhögun síðan gilda til frambúðar að breyttu breytanda. Að lokinni kosningu sóknarnefndar skal kjósa safnaðarfulltrúa og varamann hans úr hópi sóknarnefndar til fjögurra ára, sbr. 56. gr. laga um stöðu, stjórn og starfshætti þjóðkirkjunnar nr. 78/1997.

Reykjavík, 10. desember 1998.

Jón Helgason

forseti kirkjuþings.

Gunnar Sveinsson

þingskrifari.

STARFSREGLUR**um héraðsfundi og héraðsnefndir.****Hlutverk héraðsfunda, réttur til setu á héraðsfundi.**

1. gr.

Héraðsfundur er aðalfundur prófastsdæmis og fjallar um málefni sem varða starf þjóðkirkjunnar í prófastsdæminu. Þar fara fram starfsskil héraðsnefndar og sókna vegna síðasta árs, svo og reikningsskil héraðssjóðs og kirkna. Héraðsfundur samræmir og markar sameiginlegt kirkjustarf í prófastsdæminu og ráðstafar héraðssjóði fyrir næsta ár.

2. gr.

Á héraðsfundi mæta:

- a) þjónandi prestar í prófastsdæminu
- b) tveir sóknarnefndarmenn, þar af annar formaður
- c) djákna, starfandi í prófastsdæminu
- d) kirkjuþingsmenn.